

From: UUM CORPORATE COMM.
Sent: Selasa, 20 Oktober 2020 11:08 pg
To: UUM - All Staff; UUM - All Students
Subject: Pakar Undang-Undang Jenayah UUM Ketuai Pasukan Penyelidik Serantau AICHR



UUM Corporate Comm.
Universiti Utara Malaysia

20 OKTOBER 2020 / 3 RABIULAWAL 1442H
=====

"UUM : UNIVERSITI PENGURUSAN TERKEMUKA"
(THE EMINENT MANAGEMENT UNIVERSITY)

Oleh: Nordiana Shafiee
Gambar oleh: Abdul Halim Husain

PAKAR UNDANG-UNDANG JENAYAH UUM KETUAI PASUKAN PENYELIDIK SERANTAU AICHR



UUM ONLINE: Kepakaran staf akademik Universiti Utara Malaysia (UUM) terus diiktiraf di persada antarabangsa dengan pelantikan pensyarah dari Pusat Pengajian Undang-undang (SOL), Dr. Mukhriz Mat Rus sebagai Ketua Penyelidik Serantau bagi projek yang dibiayai sepenuhnya oleh ASEAN Intergovernmental Commission of Human Rights (AICHR).

Pakar dalam bidang undang-undang jenayah (criminal law) dan keadilan jenayah (criminal justice) serta pengalaman beliau dalam bidang tersebut antara kriteria utama pelantikan tersebut.

Dr. Mukhriz berkata, pelantikan itu disifatkan sebagai satu amanah besar dan pada masa sama turut menghargai kepercayaan yang telah diberikan.

Menurutnya, selain menyumbang kepada komuniti ASEAN, peluang yang ada akan dimanfaatkan sepenuhnya untuk membangunkan kemahiran penyelidikan dan memperluaskan rangkaian kerjasama.

Beliau bertanggungjawab untuk membentuk dan mengetuai satu pasukan Penyelidik Serantau (Regional Researchers) yang terdiri daripada kumpulan pakar dan pengamal undang-undang dari negara-negara ASEAN.

"Selain itu, saya juga perlu mendapatkan input dan kerjasama dari penyelidik kebangsaan (National Researchers) yang akan dilantik oleh setiap kerajaan negara-negara ASEAN.

"Penyelidikan akan tertumpu kepada undang-undang sedia ada dan amalan-amalan, juga isu-isu berkaitan hak-hak seorang tertuduh apabila dihadapkan mahkamah bagi kes jenayah di kesemua negara-negara ASEAN," katanya yang pernah berkhidmat sebagai Timbalan Pendakwa Raya di Jabatan Peguam Negara sebelum menyertai UUM pada 2015.

Tambahnya, cadangan-cadangan penambahbaikan akan dibentangkan kepada AICHR dan wakil-wakil kerajaan ASEAN di penghujung tempoh penyelidikan.

Menurut Dr. Mukhriz, penyelidikan tematik AICHR yang terkini adalah mengenai hak-hak tertuduh di mahkamah bagi kes jenayah di negara-negara ASEAN dan projek penyelidikan tematik itu diusulkan oleh perwakilan Malaysia, Eric Paulsen dan telah diluluskan oleh AICHR, justeru satu pasukan penyelidik serantau dibentuk.

Katanya, beliau berharap dengan pelantikan itu dan sumbangan yang bakal diberikan mampu mengharumkan nama UUM, khususnya Pusat Pengajian Undang-Undang di peringkat serantau dan antarabangsa.

AICHR atau Suruhanjaya Antara Kerajaan ASEAN Mengenai Hak Asasi Manusia adalah salah satu badan utama ASEAN yang bertanggungjawab mempromosi dan memartabatkan hak-hak asasi manusia di negara-negara anggota ASEAN.

Ditubuhkan pada 2009 oleh pemimpin-pemimpin ASEAN, badan ini mengangkat nilai-nilai yang disepakati negara-negara anggota yang termaktub dalam Deklarasi Hak Asasi Manusia ASEAN. AICHR dianggotai oleh perwakilan yang dilantik setiap negara ASEAN.

Dalam usaha mempromosikan dan menambahbaik mutu hak asasi manusia di ASEAN, AICHR secara berkala menganjurkan penyelidikan tematik (thematic studies) mengenai isu-isu yang dihadapi negara-negara anggota. Sehingga kini, AICHR telah mengeluarkan empat penyelidikan penting berserta saranan-saranan pembaikan kepada negara-negara anggotanya.





Please consider the environment before printing this e-mail



Universiti Utara Malaysia Official Website <http://www.uum.edu.my>

Disclaimer: This e-mail (including any attachments) may contain confidential information. If you are not the intended recipient, you are hereby notified that any review, distribution, printing, copying or use of this e-mail is strictly prohibited. If you have received this e-mail in error, please notify the sender or Universiti Utara Malaysia (UUM) immediately and delete the original message. Opinions, conclusions and other information in this e-mail that do not relate to the official business of UUM and/or its group of companies shall be understood as neither given nor endorsed by UUM and UUM accepts no responsibility for the same. All liability arising from or in connection with computer viruses and/or corrupted e-mails is excluded to the fullest extent permitted by law.